

08 JUL 2001
UUM-Satelit
UUM JADI UNIVERSITI PERTAMA GUNA TEKNOLOGI SATELIT

ALOR SETAR, 8 Julai (Bernama) -- Universiti Utara Malaysia (UUM) akan menjadi universiti pertama di negara ini yang menggunakan teknologi satelit dalam prasarana Internet dan Intranet di kampusnya di Sintok dekat sini, menjelang Ogos ini.

Naib Canselornya Datuk Dr Ahmad Fawzi Basri hari ini berkata, dengan pelaksanaan itu UUM akan mengoperasikan teknologi maklumat dan komunikasi (ICT) secara tanpa wayar sepenuhnya.

"UUM sedang bergerak ke arah penggunaan ICT berkonsepkan langit terbuka tanpa sempadan dalam penyebaran dan capaian ilmu menerusi gedung maklumat di serata dunia," katanya pada majlis penyerahan komputer kepada institusi pendidikan dan pertubuhan bukan kerajaan di sini.

Bagaimanapun, beliau belum dapat memberikan butir-butir terperinci mengenai operasi tersebut dan kos untuk membangunkan teknologi satelit sepenuhnya.

Dr Ahmad Fawzi berkata dengan menggunakan teknologi satelit sepenuhnya, UUM yang kini merupakan universiti elektronik akan beralih kepada universiti pintar apabila ia melengkapkan rangkaian komunikasi kampus ke semua kolej kediaman pelajar serta setiap bangunan yang belum lagi dirangkaikan.

Di samping itu, katanya, UUM akan juga mewujudkan tiga pusat pemasangan komputer jenama "SerindIT" yang dilaksanakan melalui program vendor yang akan diuruskan oleh anak syarikat UUM, Uniutama Management Sdn Bhd.

Tiga lokasi yang dikenalpasti untuk projek pusat pemasangan itu ialah Pusat Industri Kecil dan Sederhana KEDA, di Napoh, Pusat Pendidikan Komuniti Parlimen Kubang Pasu di Jitra dan Medan Info Desa Kampung Kok Klang di Perlis.

Pusat itu bakal memberi peluang kepada belia dan pelajar untuk mendapatkan latihan komputer dan menceburi bidang keusahawanan di samping memberi peluang pekerjaan dalam industri komputer.

UUM sebelum ini mengeluarkan komputer "SerindIT" yang dipasang sendiri dan dilancarkan oleh Perdana Menteri Datuk Seri Dr Mahathir Mohamad pada April tahun lepas.

-- BERNAMA

MNH AKD